

che et graciose, di che subito la magnificentia di misier expedi Simon Guoro provedador con 12 galie contra si achadesse il remurchio, et fezeli una degna risposta con laude et promissione assai, et parti a hore 9 de di.

*A ditta hora et giorno.* Fu suspeso l'andata de le galie, gripi et provisionati per Lepanto.

*Et a d' ditto, hore 11 de d'.* La magnificentia di misier al tutto terminò per suo giudicio che ditto soccorso se dovesse mandar a Lepanto per assai rispeti, et buono era trar al sicuro, et subito mandò a farlo intender a la magnificentia di provedadori, li quali fono di contraria opinione, el magnifico provedador Guoro non ghe era; dinotando a vostra magnificentia che ben che di sopra fazi mencione che le galie et gripi andavano a Lepanto doveano star ad obediencia dil magnifico provedador Venier, dicovi solo li gripi, perhò che subito le galie haveano comissione di ritornar. Pur l'armata turchescha ogni note si levava da lai terra, costigando per aferarsi a la punta del castel Belveder et intrar nel golfo, ma avanzava pocho, perchè poneva il zorno provenza, et convegnivano sortir et poi nui sempre star su le volte etc.

*A di 17 ditto.* A hore do de di, l'armata di Franza si apresentò sul capo de l' isola del Zante di fora zercha mia 4, subito la magnificentia di misier expedi un' altro provedador, che fo el magnifico misier Nicolò da cha de Pexaro, con 20 galie per il remurchio, perhò che cussi accadeva, et foli mandò uno presente de refrescamenti degno et pulito.

*A di ditto.* In sera dicta armata di Franza intrò, et non sorse ma stete su le volte.

*A di 18.* Ne l'alba l'armata nostra andò verso quella, *tandem* a hore 5 de di se unissemo, fati li saluti, la magnificentia di misier con el magnifico provedador Malipiero, andorno a visitation dil capitano di ditta armada, ricevuti honorevolmente, la magnificentia di misier expose al ditto capitano de ditta armata el bisogno con tante afecluose et degne parole fu possibile, infine li offerse danari per spese et altro etc. Rispose ditto capitano assaissime cose ben acomodate, che a scriverle seria longo, a la conclusion disse esser parato a tal impresa con ogni diligenza si a laude Dio benedeto che de tutta la cristianità, et per exeguir l'ordine del sacratissimo re di Franza et dil reverendissimo monsignor gran maestro di Rhodi, li quali sono deditissimi a li voleri de la illustrissima Signoria de Venexia; quanto ai danari oferti disse non bisognava nè intendeva servir con premio, vero era ze era alcune barze pur tolte et

venute a la ventura che quelle fusseno recomandate; tacio il replichar di la magnificentia di misier, perchè sapeti la natura et gràtia sua esser tempo di comprare et non vendere, et l'inimicho mai non dormire: de comun concordo terminarono di asonzere con tutta l'armata unita soto castel Tornese a la spiazza lontan da l'inimici tre mia, et per fede bona tengo che l'inimico fusse certo di non poter passar senza far conto con l'osto, et cussi fu fato: a hore 23 tutta l'armata sorti et ben tenuta tutta la note in arme, et con bona guardia.

*A d' ditto.* In sera, per uno schirazo armato da Venexia et per uno gripo da Corphù, se hebe lettere da vostra magnificentia de di do dil presente, una de di 15, l'altra 20 lujo copiosissime etc. Et di misier Alvixe Grimani fo de misier Bernardo, di 25 et 31 lujo grate a la magnificentia di misier, per le qual se intende quel se puol intender etc. Et va scrivendo cosse particular, dice le manca il tempo di poter scriver per ogni pasazo. Et è sta dato recapito a le lettere dil gran maestro di Cypro Malipiero, in Cypro.

*Insuper* el numero de le barze di Franza sono numero 16 in tutto, 4 grande, zoè la nave di la religion di bote 3000, la seconda la barza Aloysa de bote 2500, la terza Vapiamon de ditta portà, la quarta de bote 1000, tutto il resto di bote 400 in zo, 4 galie sotil, do fuste, et tre altre barze da Rhodi oltre le dictate in dicto numero sopragionse di bote 500 in zoso: se pol extimar in tutto esser azonte persone 6000. Et vostre magnificentie intenderano che da poi che la magnificentia di misier venuta la dita armada di Franza andò come ho ditto a visitation sua, la sera stessa el capitano di Franza vene a visitation di la magnificentia di misier, zerto con grande amor, ma fo li fato grande honor.

*A di 19 ditto.* De comun concordio di la magnificentia di misier, provedadori et capitano di Franza, atento che l'armata del Turcho la mazor parte era quasi in terra, et lo resto fato a modo d'un castello, uniti, che si dovesse zerchar de ponerli focho, et cussi tolseno 4 nave de le più vecchie et do caravele et poste in hordine con promissione a chi anderia suso havesseno provisione justa il solito ducati 5 al mexe e una caxa di bando.

*Item,* in dicto di la magnificentia di misier mandò per tutti li comiti et paroni di le galie grosse, et fezeli un'ammonitione di tal sorta che tutti rimaseno sbigotiti; et più aziò non se potesseno excusare sopra loro patroni, perchè potriano veramente, li dè facultà che se in lo investir li suoi patroni obstassero che